

Konfliktiråd-imut inatsit nr. 467 12. juni 2009-meersoq, tassa pineqaatisseereersimanerup qaangernerani pinerlussimasup pinerluffigineqartullu akornanni kiinneqatigiilluni oqaloqatigiissinnaanermut siunnersuineq, Kunngip akuerisaanik Kalaallit Nunaannut atuutilersinneqarsinnaasunnngortikkumallugu Naalakkersuisut danskit Naalakkersuisuinut isumaqatiginninniarnissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Aleqa Hammond, Nunatta Qitornai)

Akissuteqaat

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

Siullermeerneqarnera

Aalajangiiffigisassatut siunnersuutip massuma saqqummiuteqqinneranut Inatsisartunut ilaasortamut, Nunatta Qitornaanit Aleqa Hammondimut, Naalakkersuisut qujapput. Sammisaaq pingaaruteqarpoq, siunnersuuteqartullu apeqqummik ilungersorluni ukkataqarnera Naalakkersuisut qujamasuutigaat.

Pinerluttulerinnermi suliani eqqugaasut pinerliisullu akornanni isumaqatigiissitsiniartarnerup eqquneqarnissaata isumassarsiatsialaanera Naalakkersuisut isumaqatigaat. Tamanna pinerliisup iliutsiminut akisussaasunnngortinneqartarnissaanut pingaaruteqartuusoq, pinerliisumillu akisussaasunnngortitsisarnerup inatsisitigut aqqissuussinnermut taamaallaat tunngasassanngitsoq, aammali eqqugaasumut najukkamilu inuiaqatigiinnut tamanut tunngasassasoq Eqqartuussiveqarneq pillugu Ataatsimiititaliarsuup innersuussutaanut naapertuuppoq.

Eqqartuussiveqarneq pillugu Ataatsimiititaliarsuup innersuussutai tunngavigalugit Inatsisinut Ataatsimiititaliaq 2006-imi isumaliutissiisummik tunniussaqqarpoq, tassanilu Inatsisinut Ataatsimiititaliaq akerleriissuteqarnermi isumaqatigiinniartarneq pillugu misiligutitut aqqissuussinnermik ingerlatsinissamut assut isumaqataavoq. Tamatuma kingorna eqqartuussisarnermut inatsimmi nutaami § 319-imi aalajangersakkamik nutaamik ilanngussisoqarpoq, tassanilu allassimavoq Justitsministeria Kalaallit Nunaanni Namminersorlutik Oqartussanik oqaloqateqareerluni akerleriissuteqarnermi isumaqatigiinniartarnissamut misiligutitut aqqissuussinnermik aallartitsisinnaasoq.

Eqqartuussinnermi aalajangiinnermut taarsiullugu eqqartuussinnermilunniit aalajangiinnermut tapiliullugu akerleriinnik isumaqatigiissitsiniarneq pillugu misiligutitut aqqissuussineq aallartinneqarsinnaavoq.

Misiligutitut aqqissuussineq aallartinneqassanersoq aallartinneqassappallu qanoq isikkoqarluni aallartinneqarnissaa pillugu misiligutitut aqqissuussinnerup Justitsministeriamit aallartinneqannginnerani Kalaallit Nunaanni Eqqartuussiveqarneq pillugu Siunnersuisoqatigiinnit oqaaseqaatinik pissarsiniartoqassasoq naatsorsuutigineqarpoq.

Tamanna tunngavigalugu Kalaallit Nunaanni Eqqartuussiveqarneq pillugu Siunnersuisoqatigiit aqutsisoqatigiinnik pilersitsipput, taakkulu Kalaallit Nunaanni pissutsinut immikkut naleqqussarneqarsinnaasumik misiligutitut aqqissuussinnermik inassuteqaasiortussaapput.

Naalakkersuisut Justitsministeriallu akornanni oqaloqatigiinnerit arlallit oqartussaasut attuumassutillit peqataaffigisimasaat, soorlu Kalaallit Nunaanni Politiit Kalaallit Nunaannilu eqqartuussiviit, tunngavigalugit Naalakkersuisut 2020-mi apriliimi Justitsministeriamut saaffiginnissuteqarsimapput, tassanilu nalunaarummik ukiuni 3-ni misiligutaasumik aaqqissuussinermik imaqartumik suliaqartoqarnissaa pillugu qinnuiginnittoqarsimavoq, tassanilu eqqartuussinermi aalajangiinnermut akerleriissuteqarnermi isumaqatigiinniartarnissap ilaanissaa aamma ilanngunneqarsimalluni.

Taamaalilluni Kalaallit Nunaanni akerleriissuteqarnermi isumaqatigiinniartarneq pillugu misiligutitut aaqqissuussinerup suliarineqarnera aallarereersimavoq, suliarlu inatsisunik atuutsitsinermut tunngasuni ukiumut tullerriiaraluni pingaarnersiuiinnermut 2021-moortumut Justitsministeriamit Naalakkersuisut oqaloqatiginerat tunngavigalugu suliarineqartartumut ilanngunneqarsimalluni. Tamanna tunngavigalugu 2021-p ingerlanerani nalunaarummik nutaamik saqqummiisoqarsinnaassasoq Naalakkersuisut neriuutigaat.

Misiligutitut aaqqissuussineq Kalaallit Nunaanni pissutsinut pingaartitanullu naleqqussarneqarsinnaasoq suliaralugu aallartinneqareersimammat, akerleriissuteqarnermut siunnersuisoqatigiit pillugit inatsisip Danmarkimi atuuttup peqqussutinngornissaa pisariaqassanngitsoq Naalakkersuisut isumaqarput.

Taamaammat siunnersuutip itigartitsissutigineqarnissaa Naalakkersuisut inassutigaat.